



Služba za reviziju finansijskog poslovanja

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00) i člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2006. GODINU I POSTIZBORNOG FINANSIJSKOG IZVJEŠTAJA – OPŠTI IZBORI 2006. STRANKE ZA BOSNU I HERCEGOVINU

Broj: 03-07-6-474/08

Sarajevo, 7. avgust 2008. godine

SADRŽAJ:

MIŠLJENJE	1
1. UVOD	2
2. PREDSTAVLJANJE POLITIČKE STRANKE	2
3. OPIS REVIZIJE	3
Predmet revizije	3
Cilj revizije	3
Obim revizije	3
4. PRETHODNE REVIZIJE	3
5. NALAZI I PREPORUKE	4
5.1. NALAZI	4
5.2. PREPORUKE	7

MIŠLJENJE REVIZORA

- 1.1. Služba za reviziju finansijskog poslovanja u Centralnoj izbornoj komisiji Bosne i Hercegovine izvršila je reviziju finansijskih izvještaja za 2006. godinu **Stranke za Bosnu i Hercegovinu** i to: godišnjeg finansijskog izvještaja za 2006. godinu i finansijskog izvještaja od dana podnošenja prijave za ovjeru za izbore do dana ovjere rezultata Opštih izbora održanih u oktobru 2006. godine. Revizija je ispitivala primjenu Zakona o finansiranju političkih stranaka i primjenu člana 15.10 Izbornog zakona Bosne i Hercegovine, od strane SBiH.
- 1.2. Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.
Naša odgovornost je da izrazimo mišljenje na osnovu revizije koju smo izvršili.
- 1.3. Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka i članom 15.10 Izbornog zakona Bosne i Hercegovine.
- 1.4. Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka i članom 15.10 Izbornog zakona Bosne i Hercegovine.

Smatramo da revizija koju smo izvršili pruža razumnu osnovu za izražavanje našeg mišljenja.

Utvdili smo da Stranka za Bosnu i Hercegovinu u izvještajnom periodu nije postupila u skladu sa odredbama člana 4. stav (2), člana 6., člana 8. stav (1) i člana 11. stav (3) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaji ukazuju da je Stranka za Bosnu i Hercegovinu u 2006. godini postupala u skladu sa Zakonom o finansiranju političkih stranaka i članom 15.10 Izbornog zakona Bosne i Hercegovine.

1. UVOD

Služba za reviziju finansijskog poslovanja u Centralnoj izbornoj komisiji BiH je izvršila reviziju finansijskih izvještaja Stranke za Bosnu i Hercegovinu i to: godišnjeg finansijskog izvještaja za 2006. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Opštih izbora održanih u oktobru 2006. godine.

Revizija je preduzeta u skladu sa članom 14. stav (1) Zakona o finansiranju političkih stranaka i članom 24. Pravilnika o godišnjim finansijskim izvještajima političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Stranka za Bosnu i Hecegovinu je iskazala ukupne prihode u iznosu od 2.534.254,26 KM, čija struktura je data u sljedećoj tabeli:

Red.br.	Vrsta prihoda	Iznos u KM	Učešće u uk.prih. %
1	Članarina	35.411,96	1,40%
2	Prilozi fizičkih lica	25.912,10	1,02%
3	Prilozi pravnih lica	41.080,00	1,62%
4	Prihodi od imovine	1.979,06	0,08%
5	Prihodi od pr.lica	0,00	0,00%
6	Prihodi od poklona	8.190,68	0,32%
7	Prihodi iz budžeta	2.421.680,46	95,56%
	Ostali prihodi	0,00	0,00%
	Ukupni prihodi:	2.534.254,26	100,00%

U godišnjem finansijskom izvještaju politička stranka je iskazala ukupne rashode u iznosu od 2.774.180,79 KM.

2. PREDSTAVLJANJE POLITIČKE STRANKE

Naziv političke stranke: Stranka za Bosnu i Hercegovinu. Skraćeni naziv stranke je SBiH. Politička stranka je registrovana 25.04.1996. godine u Višem sudu u Sarajevu, broj upisa R-I-2/96. Sjedište političke stranke je u Sarajevu, ulica Maršala Tita 9a.

Lice ovlašteno za zastupanje stranke je Haris Silajdžić, predsjednik.

Lice ovlašteno za podnošenje finansijskih izvještaja za 2006. godinu je Munib Lojo.

Prema podacima iz godišnjeg finansijskog izvještaja za 2006. godinu, organizacionu strukturu¹ Stranke za Bosnu i Hercegovinu čine:

- Centrala SBiH,
- 7 kantonalnih vijeća SBiH,
- 2 regionalna vijeća SBiH,
- 64 općinskih/opštinskih savjeta SBiH i
- Žene Stranke za Bosnu i Hercegovinu.

¹ Prema podacima koje je u dodatnoj dokumentaciji dostavila SBiH organizacionu strukturu čine: Centrala SBiH, 9 kantonalnih vijeća, 68 opštinskih savjeta, 6 regionalnih vijeća i regionalno vijeće Brčko Distikt BiH.

3. OPIS REVIZIJE

Predmet revizije su godišnji finansijski izvještaj za 2006. godinu i postizborni finansijski izvještaj – Opšti izbori 2006. godine Stranke za Bosnu i Hercegovinu i to sljedećih organizacionih dijelova:

- Centrala SBiH Sarajevo,
- Kantonalno vijeće SBiH Sarajevo,
- Opštinski odbor SBiH Maglaj, i
- Opštinski odbor SBiH Konjic.

Cilj revizije je da revizoru omogući da izrazi mišljenje o tome da li je SBiH u izvještajnom periodu postupala u skladu sa odredbama Zakona o finansiranju političkih stranaka i poglavlja 15. Izbornog zakona Bosne i Hercegovine.

Obim revizije finansijskih izvještaja SBiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta, priloge fizičkih i pravnih lica i troškove kampanje.

4. PRETHODNE REVIZIJE

Izvršena je revizija finansijskih izvještaja SBiH za 2004. godinu i izdat Izvještaj o reviziji sa mišljenjem, nalazima i preporukama i dostavljen političkoj stranci. Na osnovu pregleda godišnjeg finansijskog izvještaja Stranke za Bosnu i Hercegovinu za 2005. godinu izdat je Izvještaj o pregledu sa mišljenjem, nalazima i preporukama.

Realizovane preporuke:

U skladu sa preporukama iz izvještaja o reviziji i pregledu Stranka za Bosnu i Hercegovinu je u 2006. godini primala priloge čija visina nije prelazila osam prosječnih neto plata u Bosni i Hercegovini, odnosno postupila je u skladu sa odredbom člana 5. stav (1) Zakona o finansiranju političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2006.godinu, utvrđeno je da Stranka za Bosnu i Hercegovinu nije ispoštovala sve preporuke iz Izvještaja o reviziji i Izvještaja o pregledu, odnosno i dalje postupa suprotno odredbama člana 6., člana 8. stav (1) i člana 11. stav (3) Zakona o finansiranju političkih stranaka.

5. NALAZI I PREPORUKE

5.1. NALAZI

- a) **Na osnovu obavljene revizije utvrđeno je da SBiH nije postupila u skladu sa odredbama člana 4. stav (2) Zakona o finansiranju političkih stranaka.²**

Centrala SBiH je izvršila isplatu sredstava za objavu oglasa u inostranstvu u iznosu od 2.933,75 KM, bez odgovarajućeg računa. Stranka je isplatu iz blagajne izvršila na osnovu izjave fizičkog lica³ u kojoj je navedeno da je za objavu oglasa potrebno 2.933,75 KM (1.500,00 EUR-a). Centrala stranke je putem blagajne izvršila i isplatu fizičkom licu za usluge snimanja konvencije u iznosu od 250,00 KM, bez odgovarajuće dokumentacije.

Obzirom da stranka u svojoj dokumentaciji nema račune za obavljene usluge, prekršene su odredbe člana 4. stav (2) Zakona o finansiranju političkih stranaka.

- b) **Na osnovu obavljene revizije utvrđeno je da SBiH nije postupila u skladu sa odredbama člana 6. Zakona o finansiranju političkih stranaka.⁴**

Centrala Stranke za Bosnu i Hercegovinu je primila priloge tri fizička lica - pjevača u vidu besplatnih nastupa na predizbornim skupovima ove stranke u ukupnom iznosu od 4.500,00 KM⁵. Neiskazivanjem priloga u finansijskom izvještaju, kojim se u smislu ovog zakona smatraju i usluge bez obzira da li su pružene bez naknade, Stranka za Bosnu i Hercegovinu je prekršila odredbe člana 6. Zakona o finansiranju političkih stranaka. Obzirom da Centrala SBiH u svojoj dokumentaciji nema račune za ove usluge, prekršene su i odredbe člana 4. stav (2) ovog Zakona.

- c) **Na osnovu obavljene revizije utvrđeno je da je Stranka za Bosnu i Hercegovinu prekršila odredbe člana 8. stav (1) Zakona o finansiranju političkih stranaka.⁶**

- Centrala Stranke za Bosnu i Hercegovinu koristi prostorije Federacije Bosne i Hercegovine u Sarajevu, u ulici Titova 9a, bez naknade. Troškovi zakupa poslovnih prostorija nisu evidentirani u poslovnim knjigama i nisu iskazani na obrascima troškova godišnjeg finansijskog izvještaja za 2006. godinu.
- Kantonalno vijeće SBiH Sarajevo je koristilo prostorije Opštine Stari Grad bez plaćanja zakupnine, koji prema ugovoru o zakupu poslovnih prostorija iznosi 32.628,96 KM.⁷

² Pravno ili fizičko lice koje političkoj partiji pruža uslugu ili proda proizvod mora partiji da ispostavi račun, bez obzira na to ko snosi plaćanje usluge ili proizvoda, odnosno, bez obzira na to da li je usluga pružena ili proizvod dat bez naplate.

³ Izjava fizičkog lica od 19.09.2006. godine.

⁴ Ako ukupan iznos priloga jednog pravnog ili fizičkog lica premašuje 100 KM, ta uplata mora da se unese u finansijski izvještaj u skladu sa članom 11. Zakona o finansiranju političkih stranaka.

⁵ Dodatna informacija dostavljena uz Odgovor na Preliminarni izvještaj o reviziji.

⁶ Državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu da finansiraju političke stranke.

⁷ Ugovor o zakupu poslovnih prostorija broj: 01-05-389-0496/05 od 27.05.2005. godine. Od 01.10. 2007. godine stranka ima obavezu da plaća zakupninu Opštini Stari Grad Sarajevo.

- Opštinski savjet SBiH Konjic je, na osnovu Ugovora sa Općinom Konjic od 20.09.2005. godine, koristio prostorije ove Općine bez plaćanja naknade.
- Opštinski savjet SBiH Maglaj je, na osnovu ugovora⁸ koji je sklopljen sa Službom za zapošljavanje Zeničko-Dobojskog Kantona i Jedinicom za implementaciju projekata socio-ekonomske podrške, obuke i prezapošljavanja, primio sredstva od Federalnog ministarstva rada i socijalne politike u iznosu 1.500,00 KM, što je suprotno odredbama ovog člana.

Pored navedenog, utvrđeno je da su i sljedeći odbori Stranke za Bosnu i Hercegovinu koristili prostorije opštinskih organa uprave i to: opštinski savjeti Stari Grad Sarajevo, Centar, Novo Sarajevo, Novi Grad, Ilidža, Ilijaš, Hadžići, Bihać, Sanski Most, Visoko, Zavidovići, Gradačac, Živinice, Novi Travnik, Fojnica, Jajce i Teslić.

Opštinska organizacija SBiH Ključ je za svoj rad koristila prostorije Doma kulture bez naknade a na osnovu ugovora sklopljenog sa Udruženjem žena „Ključki biser“ iz Ključa.

Korištenjem poslovnih prostorija koje su u vlasništvu entiteta, opština i neprofitnih udruženja bez plaćanja Stranka za Bosnu i Hercegovinu je postupila suprotno odredbama člana 8. stav (1) Zakona o finansiranju političkih stranaka.

d) Stranka je prekršila odredbe člana 11. stav (3) Zakona o finansiranju političkih stranaka.⁹

Obrasci finansijskog izvještaja nisu popunjeni u skladu sa Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06).

- Stranka nije navela sve organizacione odbore na obrascu 1-1 godišnjeg finansijskog izvještaja. Na ovom obrascu je, kao što je navedeno u predstavljanju stranke, iskazano da organizacionu strukturu čini 75 organizacionih dijelova, a u dodatnoj dokumentaciji 85 organizacionih dijelova stranke. Podaci o broju organizacionih dijelova stranke iskazani na obrascu 1-1 ne odgovaraju ni podacima koji su navedeni na ostalim obrascima godišnjeg finansijskog izvještaja.
- Centrala Stranke za Bosnu i Hercegovinu je u toku godine iz Budžeta BiH primila sredstva na ime dijela primanja četiri poslanika Stranke za Bosnu i Hercegovinu u Parlamentarnoj Skupštini Bosne i Hercegovine u iznosu od 4.800,00 KM, odnosno svaki od članova stranke je dao prilog u iznosu od 1.200,00 KM. Stranka je ova sredstva u godišnjem finansijskom izvještaju iskazala kao prihod iz budžeta umjesto kao priloge članova stranke.
- Kantonalno vijeće SBiH Sarajevo je u godišnjem finansijskom izvještaju za 2006. godinu iskazalo prihode od članarine u iznosu od 1.057,00 KM. Uvidom u dokumentaciju utvrđeno je da je ovaj organizacioni dio stranke na stavci članarina osim prihoda od članarine iskazao i priloge članova stranke u iznosu od 530,00 KM.¹⁰ Obzirom da se članarinom smatra samo redovni iznos koji član stranke plaća prema odredbama statuta stranke i da se svaki iznos koji prelazi iznos navedene članarine smatra prilogom, sredstva od paušala članova stranke se smatraju priložima i iskazuju na obrascima priloga fizičkih lica. Takođe, ni Centrala SBiH nije pravilno vodila evidencije o uplatama članarine i priloga članova stranke niti je u finansijskom izvještaju iskazala prihode od članarine odvojeno od

⁸ Ugovor br. CK04/152-06 o sufinansiranju zapošljavanja.

⁹ Politička stranka je obavezna da Centralnoj izbornoj komisiji Bosne i Hercegovine podnosi finansijske izvještaje na obrascima koje je odobrila Centralna izborna komisija BiH, a čiji su sadržaj i forma propisani Pravilnikom o godišnjim finansijskim izvještajima političkih stranaka.

¹⁰ Sredstava od paušala članova stranke u skladu sa Odlukom o naknadama iz paušala za finansiranje stranke.

priloga članova stranke. Dana 31.05.2006. godine i 15.11.2006. godine uplaćena su sredstva koja su opštinski savjeti SBiH Novo Sarajevo i Sanski Most prikupili na ime članarina i paušala članova stranke. Uvidom u specifikacije utvrđeno je da je OS SBiH Novo Sarajevo uplatio sredstva u iznosu od 1.213,00 KM od čega je 80,00 KM prihod od članarine, dok iznos od 1.133,00 KM čine prilozi 12 članova stranke po osnovu paušala. Prema podacima iz poslovnih knjiga, Opštinski savjet SBiH Sanski Most je uplatio sredstva u iznosu 2.322,00 KM od čega članarine iznose 956,00 KM, a 1.366,00 KM su sredstva od paušala (prilozi članova stranke).

- Stranka za Bosnu i Hercegovinu na obrascima godišnjeg finansijskog izvještaja nije iskazala podatke za Opštinski odbor SBiH Rudo. Uvidom u poslovne knjige Centrale SBiH, utvrđeno je da je OS SBiH Rudo iz Budžeta Opštine Rudo, posredno, putem Centrale Stranke za Bosnu i Hercegovinu primio sredstva u iznosu od 1.024,00 KM.
- Na obrascima godišnjeg finansijskog izvještaja Stranke za Bosnu i Hercegovinu za 2006. godinu je navedeno da je OS SBiH Konjic primio sredstva iz budžeta u iznosu od 40.188,20 KM. Uvidom u dokumentaciju utvrđeno je da su prihodi stranke iz Budžeta Općine Konjic iznosili 23.400,00 KM. Razlika od 16.788,20 KM je pogrešno iskazana kao prihod iz Budžeta HNK jer je ta sredstva na račun Općinskog savjeta SBiH Konjic uplatilo Kantonalno vijeće SBiH Mostar. U skladu sa članom 13. stav (5) Pravilnika o godišnjim finansijskim izvještajima političkih stranaka, sredstva koja jedan organizacioni dio stranke prenosi drugom organizacionom dijelu se ne smatraju prihodom stranke i kao takva se ne iskazuju u godišnjem finansijskom izvještaju.
- Uvidom u ugovore o zakupu poslovnih prostorija koje je Stranka za Bosnu i Hercegovinu dostavila Centralnoj izbornoj komisiji BiH utvrđeno je da u godišnjem finansijskom izvještaju za 2006. godinu nisu iskazani troškovi zakupa za pojedine organizacione dijelove stranke i to: troškovi zakupnine za prostorije u kojima je smješteno Kantonalno vijeće SBiH Goražde u iznosu od 1.620,00 KM, OS BiH Banja Luka u iznosu od 4.800,00 KM i OS SBiH Prijedor u iznosu od 4.800,00 KM.
Osim navedenog, utvrđeno je da su na obrascu 4-1 troškovi dnevnica i službenog putovanja iskazani manji za iznos od 650,00 KM.¹¹
- Stranka za Bosnu i Hercegovinu nije popunila obrazac pozajmica, kredita i dugova u skladu sa odredbama člana 23. Pravilnika o godišnjim finansijskim izvještajima političkih stranaka. Uvidom u poslovne knjige Centrale SBiH utvrđeno je da je na dan 31.12.2006. godine ovaj organizacioni dio imao sljedeće obaveze: obaveze prema dobavljačima u ukupnom iznosu od 22.440,55 KM, obaveze prema Velefarmaciji u iznosu od 729,87 KM i obaveze po osnovu bruto plata u iznosu od 529,67 KM što nije iskazano u godišnjem finansijskom izvještaju.
- Stranka za Bosnu i Hercegovinu je troškove kampanje iskazala manjim za 388.147,50 KM. Naime, stranka je u dopisu uz godišnji finansijski izvještaj za 2006. godinu navela da je u sporu sa dobavljačem DPP Studio i da na obrascu 5. nisu iskazane obaveze prema ovom dobavljaču. Uvidom u kartice dobavljača i račune koji su plaćeni tokom 2007. i početkom 2008. godine, utvrđeno je da je Stranka za Bosnu i Hercegovinu u godišnjem finansijskom izvještaju za 2006. godinu i postizbornom finansijskom izvještaju – Opšti izbori 2006. troškove kampanje iskazala manje za 388.147,50 KM u odnosu na ostvarene. Takođe, na obrascima troškova propagande stranka je iskazala i troškove koji se odnose na aktivnosti stranke koje nisu vezane za kampanju kao što je npr. obavještenje o održavanju konvencije stranke.

¹¹ Putni nalog br. 01/06 - Centrala SBiH

Iz svega navedenog slijedi da stranka nije pravilno iskazala ukupne rashode u 2006. godini niti je troškove pravilno iskazala na obrascima 4-1 (režijsko-administrativni i ostali troškovi) i 4-2 (troškovi propagande).

Troškovi predizborne kampanje

Stranka za Bosnu i Hercegovinu je postupila u skladu sa odredbama člana 15.10 Izbornog zakona BiH, odnosno u svrhu izborne kampanje je potrošila 1.647.811,38 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM¹² po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Stranka za Bosnu i Hercegovinu je u svrhu izborne kampanje mogla da potroši 2.748.012,00 KM.

5.2. PREPORUKE

Preporučuje se Stranci za Bosnu i Hercegovinu da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da postupa u skladu sa odredbama člana 4. stav (2), člana 6., člana 8. stav (1) i člana 11. stav (3) Zakona o finansiranju političkih stranaka i to:*
 - *da obezbijedi odgovarajuću dokumentaciju (račune) za usluge pružene stranci,*
 - *da u finansijskom izvještaju prijavljuje sve priloge pravnih i fizičkih lica iznad 100 KM bez obzira po kom osnovu ih ostvaruje,*
 - *da ne prima priloge koji su zabranjeni ovim zakonom, i*
 - *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka, a posebno da, u skladu sa članom 12. Pravilnika, prihode od članarine iskazuje odvojeno od priloga fizičkih lica.*

Imajući u vidu aktivnosti koje je Stranka za Bosnu i Hercegovinu u prethodnom periodu preduzela, a s ciljem postupanja u skladu sa odredbama ovog Zakona, preporučujemo stranci da i dalje nastavi na provođenju aktivnosti i to:

- *da u što kraćem roku utvrdi stvarno stanje svojih obaveza i da ažurira svoje knjigovodstvene evidencije¹³;*
- *da ustroji upravljanje gotovinom putem blagajne i uvede obavezu vođenja blagajničkih izvještaja na dnevnom nivou uz obavezne priloge (nalog uplate i nalog isplate; dokumenta na osnovu kojih se vrše isplate putem blagajne). Poslovanje blagajne treba urediti tako da se*

¹² Član 15.10 stav 2. propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

¹³ Uvidom u pojedinačne kartice dobavljača utvrđeno je da su u ranijim godinama izvršena plaćanja obaveza prema dobavljačima a da računi nisu dostavljeni stranci i nisu knjiženi. Iz tog razloga, stranka na obavezama ima pretplatu.

razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma;¹⁴ i

- *da uspostavi odgovarajuće evidencije o uplatama članarine i priloga članova stranke.*

Komentar

U ostavljenom roku Stranka za Bosnu i Hercegovinu je dostavila odgovor na Preliminarni izvještaj o reviziji godišnjeg finansijskog izvještaja za 2006. godinu i postizbornog finansijskog izvještaja – Opšti izbori 2006. Uz odgovor je dostavljena i dodatna informacija u kojoj je navedena vrijednost nastupa pjevača na predizbornim skupovima Stranke za Bosnu i Hercegovinu, što je u formi nalaza ugrađeno u Izvještaj o reviziji. Osim navedenog, stranka je dostavila i ugovore o zakupu poslovnih prostorija za pojedine opštinske odbore. Stranka za Bosnu i Hercegovinu je u svom odgovoru navela da nema primjedbe na Preliminarni izvještaj o reviziji i istakla da će preduzeti sve korake kako bi otklonila utvrđene propuste.

Zahvaljujemo se zaposlenim u Centrali i odborima Stranke za Bosnu i Hercegovinu čiji su izvještaji bili predmet revizije, na dobroj i korektnoj saradnji tokom obavljanja revizije finansijskih izvještaja.

Hasida Gušić, šef Službe

Sanja Čabrilo, revizor

Nevenko Andan, revizor

Željko Bakalar, pomoćnik revizora

¹⁴ Opštinski savjeti SBIH Konjic i Maglaj blagajnu sačinjavaju periodično. Blagajnički nalozi isplate nisu potpisani od strane lica koja su sredstva primila. Uvidom u dokumentaciju KV SBIH Sarajevo utvrđeno da postoji mala razlika u početnom stanju blagajne na dan 01.01.2006. godine u odnosu na 31.12.2005. godine.